



Jadual Pembacaan Khutbah Jumaat

Siri 9/ 2023 (September Tahun 2023)

Tarikh	Tajuk	Bil.
1 September 2023M/ 15 Safar 1445H	Islam Agama Kasih Sayang	1.
8 September 2023M/ 22 Safar 1445H	Beradab Dengan Kematian	2.
15 September 2023M/ 29 Safar 1445H	Serumpun Bak Serai, Sesusun Bak Sireh	3.
22 September 2023M/ 6 Rabi'ul Awwal 1445H	Generasi Berilmu Tonggak Kecemerlangan Ummah	4.
29 September 2023M/ 13 Rabi'ul Awwal 1445H	Rasulullah Suri Teladan Sepanjang Zaman (Khutbah Sempena Sambutan Maulidur Rasul 1445H)	5.
Khutbah Kedua		

دبیایاء:



زكاة فولاو فینغ

دتریبتکن:



جابتن حال احوال اکام اسلام فولاو فینغ



Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



Beradab Dengan Kematian

7 September 2023M/ 21 Safar 1445H

الْحَمْدُ لِلَّهِ الَّذِي حَذَّرَ مِنَ الْمَوْتِ عِبَادَهُ الْمُتَّقِينَ، وَشَرَعَ سُنَنًا وَأَدَابًا بَعْدَهُ عَلَى
الْمُؤْمِنِينَ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، رَبُّ السَّمَوَاتِ السَّبْعِ وَرَبُّ الْأَرْضِينَ،
وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُ اللَّهِ وَرَسُولُهُ، سَيِّدُ الْأَوَّلِينَ وَالْآخِرِينَ، وَقُدْوَةٌ
خَلَقَ اللَّهُ أَجْمَعِينَ.

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ، وَعَلَى آلِهِ وَصَحَابَتِهِ الْمُخْبِتِينَ،
والتَّابِعِينَ وَتَابِعِيهِمْ بِإِحْسَانٍ إِلَى يَوْمِ الدِّينِ.

أَمَّا بَعْدُ، فَاتَّقُوا اللَّهَ، عِبَادَ اللَّهِ، بِفِعْلِ مَا أَمَرَ، وَبِاجْتِنَابِ مَا نَهَى عَنْهُ وَزَجَرَ.

SIDANG MUKMININ RAHIMAKUMULLAH,

Khatib menyeru kepada semua jemaah sekalian agar berusaha mendapatkan tingkatan takwa yang terbaik. Hanya ketakwaan yang akan memandu kita hidup di atas landasan syariat dan matinya kita nanti mendapat kejayaan di akhirat.

Sebelum melanjutkan bicara, marilah kita memberikan sepenuh tumpuan kepada isi kandungan khutbah hari ini. Jangan berbual-bual, tidur



dengan sengaja, bermain telefon bimbit dan menggerakkan tabung kutipan Jumaat kerana ia bertentangan dengan sunnah serta adab.

Khatib menyeru kepada sidang jemaah sekalian supaya memberi sepenuh tumpuan kepada apa yang khatib ingin sampaikan. Mudah-mudahan pengisian khutbah pada hari ini memberikan impak kepada iman, takwa dan hidup kita. Mimbar pada minggu ini ingin mengangkat tajuk: **Beradab Dengan Kematian** untuk kita tadabbur bersama, insya-Allah.

SIDANG JUMAAT YANG DIRAHMATI ALLAH SEKALIAN,

Kematian adalah saat paling genting kepada manusia. Sama ada kita bersedia atau tidak, suka atau tidak, kita pasti akan melalui peritanya kematian. Justeru, kematian yang berlaku di sekeliling kita tidak akan mengira masa dan tempat. Allah **سُبْحَانَهُ وَتَعَالَى** telah berfirman dalam surah An-Nisa' ayat 78:

أَيْنَمَا تَكُونُوا يُدْرِكْكُمُ الْمَوْتُ وَلَوْ كُنْتُمْ فِي بُرُوجٍ مُّشِيدَةٍ ... ﴿٧٨﴾

Maksudnya: *“Di mana-mana sahaja kamu berada, kematian akan datang mendapatkan kamu (apabila sampai ajal) walaupun kamu berada di dalam benteng yang tinggi dan kukuh.”*

Menziarahi kematian adalah satu sunnah Nabi **صَلَّى اللَّهُ عَلَيْهِ وَسَلَّمَ** yang amat dituntut. Malahan, menziarahi orang yang sakit juga sepatutnya menjadi satu



budaya dalam bermasyarakat. Nabi صَلَّى اللهُ عَلَيْهِ وَسَلَّمَ bersabda melalui hadis Baginda:

حَقُّ الْمُسْلِمِ عَلَى الْمُسْلِمِ سِتٌّ: إِذَا لَقَيْتَهُ فَسَلِّمْ عَلَيْهِ، وَإِذَا دَعَاكَ فَأَجِبْهُ، وَإِذَا اسْتَنْصَحَكَ فَاَنْصَحْهُ، وَإِذَا عَطَسَ فَحَمِدَ اللَّهَ فَسَمِّتْهُ، وَإِذَا مَرِضَ فَعُدَّهُ، وَإِذَا مَاتَ فَاتَّبِعْهُ

Maksudnya: “*Hak muslim kepada muslim yang lain ada enam: Apabila kamu berjumpa, ucapkanlah salam kepadanya. Apabila kamu diundang ke kenduri walimahnyanya, maka penuhilah undangannya. Apabila kamu diminta nasihat, berilah nasihat kepadanya. Apabila dia bersin lalu dia memuji Allah, maka doakanlah dia. Apabila dia sakit, maka ziarahilah dia dan apabila dia meninggal dunia, iringilah jenazahnya (sampai ke perkuburan).*”

﴿Hadis Riwayat Muslim﴾

Namun, masih wujud segelintir umat Islam yang tidak lagi menjadikan perkara ini sebagai satu kemestian. Maka, hilanglah satu sunnah Nabi dalam kehidupan bermasyarakat. Natijahnya, hilanglah jua kemanisan persaudaraan yang sepatutnya dapat menambah keberkatan dalam sesebuah masyarakat.

SIDANG MUSLIMIN SEKALIAN,

Kematian seseorang akan diiringi dengan perasaan sedih dan hiba terutamanya dalam kalangan ahli keluarga. Isteri kehilangan suami dan sebaliknya atau anak-anak kehilangan ayah yang menjadi tunjang



penghidupan. Bagi ibu bapa yang kematian anak, sudah pasti tidak dapat menahan rasa hiba yang mencengkam hati. Bahkan, kehilangan saudara-mara atau sahabat handai turut menyebabkan kita menangis kesedihan. Keadaan akan bertambah pilu andai kematian berlaku secara mengejut seperti terlibat dalam kemalangan, serangan jantung secara tiba-tiba atau ditimpa bencana.

Justeru saudaraku sekalian, ketika mana kita menziarahi rumah yang adanya kematian, hormatilah perasaan ahli keluarga yang sedang bersedih. Jangan hanya duduk bersebang kosong dan membuat perkara yang tidak berfaedah, apatah lagi bergurau dan bergelak ketawa ketika jenazah masih ada di dalam rumah. Perbuatan ini seolah-olah tidak menghormati jenazah dan menyakiti hati para waris atau mereka yang berkaitan dengan si mati.

Sewajarnya ketika menziarahi kematian, penuhilah masa kita dengan membaca ayat-ayat suci Al-Quran dengan diniatkan pahalanya untuk si mati. Banyakkan juga berdoa untuk al marhum atau al marhumah di saat menatap wajahnya. Jangan lupa mengucapkan kata-kata semangat kepada ahli keluarganya di samping meminta mereka bersabar dengan ujian.

SAUDARAKU SEKALIAN,

Antara adab yang disarankan ketika mendengar berita kematian, selain daripada mengucapkan "إِنَّا لِلَّهِ وَإِنَّا إِلَيْهِ رَاجِعُونَ", sunat juga bagi kita untuk menyediakan makanan kepada ahli keluarga si mati. Amalan ini dapat menghilangkan keresahan dan keletihan mereka menghadapi hari yang cukup mencabar. Hal ini disebutkan dalam sebuah hadis Nabi



صَلَّى اللَّهُ عَلَيْهِ وَسَلَّمَ yang mengarahkan agar dibuatkan makanan kepada keluarga Jaafar bin Abi Talib رَضِيَ اللَّهُ عَنْهُ:

إِصْنَعُوا لِآلِ جَعْفَرٍ طَعَامًا فَإِنَّهُ قَدْ آتَاهُمْ أَمْرٌ شَغَلَهُمْ

Maksudnya: “Sediakanlah makanan untuk keluarga Jaafar, sesungguhnya mereka disibukkan oleh musibah yang menimpa.”

﴿Hadis Riwayat Abu Daud﴾

SIDANG JUMAAT YANG DIMULIAKAN,

Selain itu, berusahalah melazimi perkara-perkara yang dianjurkan syarak, antaranya:

Pertama: Jadikanlah ziarah kematian saudara-mara dan jiran tetangga kita sebagai satu budaya dalam kalangan ahli keluarga.

Kedua: Belajarlah ilmu agama berkaitan pengurusan jenazah walaupun yang paling asas supaya kita faham apa yang perlu dilakukan apabila ahli keluarga kita meninggal dunia.

Umpamanya membersihkan segala sisa najis pada mayat dengan segera selepas kematiannya. Jangan sampai aib jenazah ahli keluarga kita terlihat oleh tukang mandi jenazah dan orang yang datang berziarah.

Ketiga: Setiap keluarga sewajarnya menyertai khairat kematian yang dikelolai kariah masing-masing agar tidak menyukarkan ahli waris jika



berlaku kematian. Dalam masa yang sama, pemegang amanah khairat kematian perlu membuat urusan pembayaran khairat secepat mungkin supaya waris tidak terbeban terutama keluarga yang miskin.

Keempat: Ahli keluarga dan pihak bertanggungjawab dalam kariah perlu meyakinkan kepada ahli keluarga si mati agar menguruskan dengan segera urusan fardhu kifayah kepada mayat supaya tertunai hak mayat tersebut.

Kelima: Setiap ahli masyarakat perlu berhati-hati jangan sampai mengaibkan si mati. Jangan sesekali menyebarkan gambar atau video si mati dalam keadaan yang aib, apatah lagi dalam keadaan mengerikan melalui sebarang media untuk tatapan umum. Perbuatan ini adalah haram kerana mengaibkan mayat dan sudah tentu menyakiti hati keluarganya dan meninggalkan kesan trauma kepada mereka.

SIDANG MUSLIMIN RAHIMAKUMULLAH,

Ambillah perhatian saudara-saudaraku sekalian. Urusan kematian menjadi tanggungjawab kepada orang yang masih hidup sebagai fardhu kifayah, maka perlakukanlah mayat dengan segala kelembutan dan tunaikanlah segala hak mereka yang sudah bergelar jenazah. Justeru, *mentajhizkan* atau menguruskan mayat adalah perkara penting yang wajar kita semua pelajari.

Suka khatib memperingati diri sendiri dan jemaah sekalian, bahawasanya kematian adalah satu urusan yang amat besar dan mengerikan. Maka bertakwalah kalian kepada Allah, perbanyakkan taubat dengan sebenar-benar taubat, maafkanlah kesalahan-kesalahan orang lain



dan pohonlah kemaafan daripada mereka yang pernah kita sakiti atau bermasam muka.

Untuk akhirnya, berdoalah untuk kebaikan si mati dan jangan sekali-kali menyebut-nyebut keburukan si mati. Ucaplah takziah kepada keluarga si mati sepertimana yang diajar oleh Rasulullah ﷺ:

إِنَّ لِلَّهِ مَا أَخَذَ، وَلَهُ مَا أُعْطِيَ، وَكُلُّ شَيْءٍ عِنْدَهُ بِأَجَلٍ مُّسَمًّى، فَلْتَصْبِرْ وَلْتَحْتَسِبْ

Maksudnya: “Sesungguhnya bagi Allah apa yang Dia ambil dan milik-Nya jualah apa yang Dia berikan. Kesemuanya terdapat ajal (tempoh masa) yang tertentu disisinya. Maka bersabarlah, nescaya kamu akan mendapat ganjaran.”

﴿Hadis Riwayat Al-Bukhari﴾

Semoga kita dapat pulang ke hadrat Allah ﷻ dalam keadaan terampun segala dosa. Moga menjadi asbab mengundang rahmat Allah dan terpilih untuk menghuni syurga-Nya.

Firman Allah dalam surah Ali Imran ayat 185:

كُلُّ نَفْسٍ ذَائِقَةُ الْمَوْتِ وَإِنَّمَا تُوَفَّوْنَ أُجُورَكُمْ يَوْمَ الْقِيَامَةِ فَمَنْ زُحِرَ عَنِ النَّارِ وَأُدْخِلَ

الْجَنَّةَ فَقَدْ فَازَ وَمَا الْحَيَاةُ الدُّنْيَا إِلَّا مَتَاعُ الْغُرُورِ ﴿١٨٥﴾

Maksudnya: “Setiap yang bernyawa akan merasai mati. Sesungguhnya pada Hari Kiamat sahajalah disempurnakan balasan (pahala) kamu. Pada



ketika itu, sesiapa yang dijauhkan dari neraka dan dimasukkan ke dalam syurga. Maka sesungguhnya dia telah berjaya. Dan kehidupan di dunia (meliputi segala kemewahan dan pangkat kebesaran) tidak lain hanyalah kesenangan yang memperdayakan.”

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ، أَقُولُ مَا
سَمِعْتُمْ، وَأَسْتَغْفِرُ اللهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ، إِنَّهُ
هُوَ الْغَفُورُ الرَّحِيمُ.



Khutbah Kedua Bulan September

2023M/ 1445H

الْحَمْدُ لِلَّهِ عَلَىٰ آلَائِهِ وَإِحْسَانِهِ، وَالشُّكْرُ لَهُ عَلَىٰ تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِشَأْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَىٰ رِضْوَانِهِ.
صَلَّى اللَّهُ وَسَلَّم عَلَىٰ سَيِّدِنَا مُحَمَّدٍ وَعَلَىٰ آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَىٰ رَبِّكُمْ حَقَّ تَقَاتِهِ، وَاَعْمَلُوا بِطَاعَتِهِ وَمَرْضَاتِهِ،
ثُمَّ اْعَلَمُوا أَنَّ اللَّهَ سُبْحَانَهُ وَتَعَالَىٰ أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾
[الأحزاب: 56]

اللَّهُمَّ صَلِّ وَسَلَّم عَلَىٰ عَبْدِكَ وَرَسُولِكَ مُحَمَّدٍ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنِ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَىٰ
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَىٰ صَاحِبِ الْجَلَالَةِ،



Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibn Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرِّبَا وَالرِّزْنَ وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَّنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.



رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَائِي ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٩٠﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوا
عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٩١﴾